



**2025-imut Aningaasaqarnermut inatsisissatut siunnersuut.**

(Aningaasaqarnermut akileraartarnermullu Naalakkersuisoq)  
(Aappassaaneerreqarnera)

Isornartorsiuisorujussuuvunga Naalakkersuisut Aningaasaqarnermut inatsisissatut siunnersuutaat siullermeerneqarmat. Sulilu taamaappunga. Siunnersuut pitsanngoriarsimannngilaq siullermeerneqarnerminiit – akierlianilli siunnersuut ajornerulersimavoq Naalakkersuisut allannguutissatut arlalinnik siunnersuuteqarneratigut. Tamanna uterfigeqqissavara.

Allarluinnarmiit aallarterusuppunga.

Tassami sulil pakatsisimaarutigigakku, Naalakkersuisut namminneq akileraartarnermut aaqqissusseqqiinnerminnut aningaasaliinissamut kissaateqannginnerat. Isumaqaqpungami, naleqqulluinnartoq, Naalakkersuisut piumasaqassappata, uagut partiit aningaasalersuinissamut siunnersuutitik nassarluta ataatsimiigiassasugut, tamannali illuatungaaniit aamma pisariaqarpoq. Taamaattumik Naalakkersuisut piumaffigeqqerusuppakka namminneerlutik akileraartarnermut aaqqissusseqqiinnerminnut aningaasaliinissamut siunnersuummik saqqummiusseqqullugit. Tamanna aningaasaliineq atorneqarsinnaammat kissaaterpassuit ilaannit, partiinit saqqummiunneqarsimasunut, aningaasaliinermut.

Eqqortormi ajoraluartumik unaavoq, Naalakkersuisut ukiunut sisamanut 5 millioner koruuniinnarnik immikkoortitsisimasut partiit kissaataasa aningaasalersornissaannut. Taakku aningaasa suunngillat, Naalakkersuisuniilli allannguutissatut siunnersuuteqarnermi ima ikilitigalutit suunngilluinnalerlutik. Maannakkummi piviusoq unaavoq, amigartoorut 85 millioner koruuningajaammat ukiunut sisamanut tulliuuttunut isigiganni partiinit kissaatigineqartut akuerineqarnissaannut. 2025-imut amigartoorut 22,5 millioner koruuniuvoq. Taamaattumik imatut paasineqartariaqarpoq, ajornakusoorluinnalissasoq partiinit kissaatigineqartut piviusunngortinnissaat, taamaattumillu Naalakkersuisut ukuninnga apererusuppakka:

1. Naalakkersuisut piviusorsiorlutut isiginerpaat, partiit Inatsisartuni kissaatigisatik pisinnaassagaat aningaasanut inatsisissaviup isumaqatiginninniutigineqarneranut atatillugu?
2. Naalakkersuisut naatsorsuutiginerpaat, allannguutissatut siunnersuutissami pingajussaaneerreqarnissaanut inassisimaffik sulil ajornerulersissagaa?

**Demokraatinit kissaatigisat**

Uagut Demokraatiniit Naalakkersuisunut isumaqatiginninniarnitsinni ingasaassinaveersaarsimavugut, inuiaqatigiitsinnili suliaasaqarpoq, qaffanneqarnissamik pisariaqartitsisunik, taakkulu suliaasat



ukkatarissallugit toqqarsimavarput.

Naalackersuisunut isumaqatiginninniarnitsinni tamanna tunggavigalugu ukuningga kissaateqarsimavugut:

**Meeqqat atuarfiat** – Kissaatigaarput, meeqqat atuarfiannut ukiumut 15 millioner koruuninik immikkoortitsisoqartassasoq. Aningaasat toraagalimmik nalilersorneqartuartassapput kalaallisut ilinniartitsinermi atortussanut pingaartumik fagini kalaallisut, matematik, inuiaqatigiilerinermi aammalu kinguaassiornermut tunggasumik sammisaqarnermut. Taakku saniatigut aningaasat immikkut atuartsinerup nukittorsarnissaanut atorneqartussatut pingartinneqassapput

**Peqqinnissaq** – Kissaatigaarput, ukiumut angusassamik toraagaralugu sulisut tigungmiinnarnissaannut suliniutinut 10 millioner koruuninik immikkoortitsisoqassasoq, piginnaasanik qaffasaanikkut ilinniartitseqqinnikkullu peqqinnissaqarfimmi sulinerup nuannersortaa pitsaasusaalu qaffassarneqassammata. Taakku saniatigut kissaatigaarput suliniuteqartoqassasoq peqqinnissaqarfimmi sulisunik nunanit avannarlerniunngitsoq allanit pissarsiniartoqartarnermut ukkatarinninnissaq.

**Angerlarsimaffiup avataanut inissiinerit** – Kissaatigaarput, agguagassatut 5 millioner koruunit immikkoortinneqassasut angajoqqaat ikiorniarlugit, meeqqaminnik ataatsimik arlalinnilluunniit pinngitsaalisamik arsaarinneriaannarnik, namminneerlutik meeqqaminnik isumaginnissinnaasunngorlugit taamaasiornikkullu angerlarsimaffiup avataanut inissiineritut aningaasartuutaasussat pinaveersaartillugit.

**Timersornermi pikkorissut** – Kissaatigaarput, ukiumut 10 millioner koruunit ilassutitut timersornermi pikkorissumut immikkoortinneqartassasut. Aningaasa sungiusarluni katersuuttarnissanut amerlanerusunut aammalu nunanut assigiinngitsunut unammiarnernut/pisunut amerlanernut peqataasarnissanut.

**Aallarnisaaneq** – Kissaatigaarput, ukiumut agguagassatut fem millioner koruunit aallarnisaanerup siuarsarnissaanut immikkoortinneqassasut. Aallarnisaasut tamanna aqqutigalugu aningaasanik qinnuteqarsinnaasassapput aallarnisarnissaminnut aammalu pikkorissarnernut soorlu assersuutigalugu pilerisaarinernut, naatsorsuuserinermut assigisaanullu. Agguagassat aqunneqassapput avataaniit soorlu Nalik Ventures-imiit.

**Innarluutillit peqatigiiffii** – Kissaatigaarput, ukiumut piffinni innarluutillit peqatigiiffiinut 2 millioner koruuninik immikkoortitsisoqartassasoq.

Taakku kissaatigisat suli sulissutigaaqut taparserneqarnissaat. Isumaqatiginninniarnilleriilii ataqqillugit paasitissinnaanagulu paasiterusunngilara, qanoq Naalackersuisut kissaatigisatsinnut isummersornermut. Oqaannassaangali, qujamasuutigigakku, tusarnaarneqarsimagatta qilanaarlutalu Naalackersuisunit isumaqatiginninniaqateqaqqinnissatsinnut.

Kisitsisilli nutaanerpaat, saqqummiunneqartut malillugit takusinnaavara, isumaqatigiinnissaq ajrnakusuussasoq. Tamannarpiarlu pillugu pisariaqartorujussuurtut isigaara, Naalackersuisut namminneq



akileraartarnermut aqqissuusseqqiinertik aningaasalersussagaat. Isumaqarpungami, Naalakkersuisut imminnut pisussaaffilertariaqartut taamaaliornissaminnut.

### **Aningaasaqarnikkut siunissaq ernumanartoq**

Aningaasaqarnikkut inissisimanermit, alakkaamalikkatsinnut sulii ernumavunga. Naalakkersuisut ajoraluartumik aningaasaqarnerput qajannaatsunngortissinnaasimanngilaat. Eqqaamassavarput, piffissami aningaasatigut ingerlalluarfimmi aqqusaagaqareeratta, inuiaqatigiinni sullittoqarluni ilaatigut mittarfissarsuit sanaartorneranni. Atugarissaartinneqarsimavugummi nunarsuarmit aalisakkat akiisigut, ikummatissanullu isumaqatigiissutinut pitsaasunut. Aningaasaatitta nalikillinerat danskiniit appasinnerusuimavoq, taamaattumillu kinguneqarsimalluni, bloktilskuddip naalagaaffimmiit uagutsinnut iluaqutaasumik aqqiivigineqarsimalluni, maanngaanniit aningaasanik amerlanernik pissarsiffiusumik illuatungaaningarniit. Taakku saniatigut pingaartuuvoq isummerfigissallugu, najugaqariaatsitta ineriartornerata kingunerimmagu, maani nunatsinni utoqqaat amerligaluttuinnarnerat, tamannalumi nuannaarutigiinnassavarput, isumaqarmammi, nuannaarutaasumik peqatigijuartassagigut. Aammattaarli kingunerissavaa, aningaasanik amerlanernik pisariaqartitsinerput soorlu assersuutigalugu utoqqalinersianut, angerlarsimaffimmi ikiortinut aammalu peqqinnissaqarfik tamaat isigalugu. Tamanna soorlu naatsorsuutigineqarsimanngitsoq Aningaasanut inatsisissatut siunnersuummi, taamaattumillu kingunerissallugu, ukiuni tulluittuni aningaasaliissutissatsinnik sulii amerlanernik ujarlertariaqassasugut pisussaaffigut naammassiniarlugit utoqqartatsinnut, tamarmimmi toqqissisimasumik ataqqinartumillu utoqqalisariaqarmata.

Amerlanernik taakkartuisinnaagaluarpunga, eqqarsarpungali, sunissami aningaasaqarnikkut inissisimanitsinnut ernumassuteqarnera paasineqassasoq.

Taamaattumik Naalakkersuisut ukuninga apererusuppakka:

1. Suliniutit suut Naalakkersuisut pilersaarutigaat aningaasaqarnikkut unammilligassat, siunissami qaninnerpaami suliarisariaqakkagut, pakkersimaarniarlugit?
2. Naalakkersuisut ernumaqatiginerpaannga, ukiut arlaqanngitsut qaangiuppata, danskit aningaasaataasa naleerukkiartornerat uagutsinniit appasinnerusussaq aammalu bloktilskuddi nalikinnerulertussaammat?
3. Naalakkersuisut ernumaqatiginerpaannga, sanaartorneq appariartortoq inuiaqatigiillu aningaasaqarneranut pitsaanngitsumik kinguneqartussaammat ukiuni aggersuni?
4. Isertitatsinni annerpaarpaajusoq tassaavoq raajarniarneq. Suut tamarmik ilimanarsisippaat ukiun aggersuni maannakkumiit annikinnerulissasoq. Qanorluunniit taava kingunerissavaa, nunatta karsiata raajanut akitsuutinit isertitai appassasu, naatsorsuutigisariaqarlunilu, avataasiortuni fabrikkinilu sulisut annikinnerit pisariaqartinneqalissasut, taakkulu aamma kingunerissallugu, isertitanit akileraarutinit isertitakinnerulernissaq. Suliniutit suut Naalakkersuisut raajartassat apparnissaannik naatsorsuutaasut kingunissaasa annikinnerulersinnissaannut pilersaarutigaat?



Neriuppunga, Naalakkersuisut unamminartut taakku eqqarsaatigisimassagaat, apeqqutimalu akissuteqarfigineqarnissaat qilanaaraara.

Aammattaarlu qilanaaraara isumaqatiginninniarnert nangeqqinnissaat neriullunga, kissaatigisagut Demokraatiniit piviusunnngortinneqarumaartut.

Siunnersuut taamatut oqaaseqaatitalerlugu Aningaasaqarnermut- aamma Akileraartarnermut ataatsimiititaliami suliareqqinneqarnissaa innersuunneqarpoq.